

**Sunday, July 6, 2025**

**Time - 2:30pm - 2:35pm**

**AKASHVANI AIZAWL**  
**REGIONAL NEWS UNIT**

**REGIONAL NEWS BULLETIN**  
**(MIDDAY)**



**HEALTH & HOSPITAL SUNDAY**

Vawiin hi Mizoram Presbyterian Kohhran ni pawimawh Health Sunday & Hospital Sunday (Damdawi In Pathianni) a ni a,he ni pual hian Pathian biak inkhawmah hun hman a ni.

Health Sunday leh Hospital Sunday-ah hian chawhnu inkhawm hi Health Sunday puala hman a ni a, zan inkhawmah Hospital Sunday pualin thawhlawm lak khawm a ni ang a, Hospital Charity Fund atan hman a ni ang. Mizoram Presbyterian Kohhran chuan Health Sunday leh Hospital Sunday pual hian Synod Hospital-a damlo mi rethei leh harsa, damdawi ina awmna man pe thei lo leh pek tlak tur nei lote a peksak leh a ni.

Synod Hospital thuchhuah tarlan danin, Health Sunday leh Hospital Sunday pualin Synod hospital chuan damdawi-in awm man pe thei lo chhungkaw khawsak harsa te enkawl na senso a peksak thin a. Kum 2020 atanga kumin thlengin damlo 3,259 pek sak tawhin heng zingah hian damlo 2,263 chu Presbyterian kohhran mi an ni a, damlo 996 chu kohhran dang mite an ni. Synod Hospital thuchhuah chuan kumin June 30 thleng khan damlo 480 damdawi-in awm man ba an la awm a, hei hi a vaiin cheng nuai 203 sing 5 sang 9 leh 678 a ni.

Mizoram Presbyterian Kohhran chuan Hospital Sunday hi kum 1928 atangin a hmang tan a, kum 1981 atangin July thla Pathianni hmasa ber hi Hospital Sunday atan hman tan a ni a. Kum 2008-a Synod-in "Health Sunday leh Hospital Sunday hi Pathianni vawi khatah a ruala hman ni se" tia a rel angin kum 2010 atangin July Pathianni hmasa bera hman thin a ni ta a ni.



**YMA ON CHIN CONFLICT**

Central YMA hruiute chuan Myanmar ram chung, Chin state-a Chin pawl ralthuam keng pahnihte inkara tharum thawhna thlawp chungchang an hruiute an sawipui.

Central YMA hruaitute hian Chin National Organisation (CNO) leh an ralthuam keng Chin National Defense Force (CNDF) leh Hualngoram Peoples Organisation (HPO) leh an ralthuam keng Chinland Defense Force (CDF)-Hualngoram te inkara buaina leh inkah hial a chhuah chungchang ah heng pawl pahnih hruaitute hi nizan khan lengah sawmin a kawm a. CNO/CNDF leh HPO/CDF-Hualngoram inkar buaina avangin mihring nunna chan an awm leh nunau sang tam tak thlabar manganga an awm chungchang sawiho a ni .

Heng pawl pahnih hruaitute hian Central YMA hruaitute ngenna angin mipui nunau ten an tawrh zel loh na’n tun dinhmunah chuan inkahhai (ceasefire) an remti a. A tul angin pawl pahnih inkara inhriatthiam lohna hrang hrangte chu la sawiho zel ni se an ti tih vawiina CYMA thuchhuah chuan a tarlang a ni.



**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh [newsonair.gov.in](http://newsonair.gov.in) ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



**FOUR LANE**

Mizoram a kawngpui thlur li a sial hna chak zawka a kal theihna turin nimin khan Environment & Forest Climate Change Secretary Pu H Lalengmawia hovin, Kolasib-ah NHIDCL leh EF&CC Department hotute an thukhawm.

Thutkhawmna-ah hian Pu H Lalengmawia chuan kawngpui thlur 4 a siam tur laih hna chak zawka a kal theih na'n Department hrang hrang; a bikin EF&CC, P&E leh District thuneitute chuan thawhhona leh inhriatthiamna tha zawk an neih a pawimawh a ni, a ti a. An hmalakna a muan chhante hrechianga chak zawka kawng laih hna a kal theih na'n thing kih ngai te, electric hrui leh ban sawn chungchangah te pawh NHIDCL, P&E leh Forest Department–te chu a tul anga hma la zui turin a hrilh a. Hemi kawnga harsatna a awm a nih chuan a rang thei ang bera District thuneitu hriattir turin kalkhawmte chu a hrilh bawk.

Mizoram a kawngpui thlur 4 sial hna hi tunhnai khan thawh 3-na huamchhung Vairengte leh a chhehvel atangin tan a ni a. Amaherawhchu he kawngpuiin a paltlang tura thing leh maute senghawina kawngah harstana thenkhat a awm avangin, hnathawktute hmalakna a ti muang ni a hriat a ni.



**PASSION FRUIT**

Nimin khan Adviser to Chief Minister (Technical) Pu H. Ginzalala hmalakna-in khaw pali - N. Khawbung, Ngur, Zote leh Hmunhmeltha-ah Sapthei chi sem chhuah a ni.

Pu H. Ginazalala chuan kuthnathawktute chu theihtawp chhuah turin a fuih a, sapthei an tharchhuahte hralhna (market) lamah harsatna awm lo turin theih tawp a hmalak a tum thu a sawi a. MIFCO nen pawh an inbiak pawh reng thu sawiin sapthei tam tak an thar chuan MIFCO lam hian a hmunah ngei an leisak theih tur thu an sawi bawk a ni.

Champhai district ATMA project director Dr. C. Lalhriatpuia kaihhruaiin he’ng khaw pali-ah te hian Sapthei chin dan inzirtir a ni a, sapthei natna leh harsatna awm thei te farmer te hrilhin a zirtir nghal bawk a ni. Hei bakah hian a zamna tur thirzaite pawh sem chhuak leh turin hmalak a ni a. Natna leh rannung ei chhe tu laka venna tur damdawi te pawh a tul hun a sem chhuah mai theih turin peihfel a ni tawh bawk. Ngur khua bikah hian Sapthei bakah nimbu tiak 10,000 sem chhuah nghal a ni.



**PM ARRIVES IN RIO DE JANEIRO**

BRICS Summit vawi 17-naa tel turin Prime Minister Narendra Modi-a’n tukin khan Brazil-a Rio de Janeiro khawpui a thleng a, khawmpui hman zawhah Brasilia khawpuiah kalin Brazil President Luiz Inacio Lula da Silva nen ram 2 inkungkaihna chungchang a sawipui ang tih social media-ah a tarlang a ni.

Akashvani Corr sawi danin Pu Modi-a hi Brazil-a India mi cheng-ten ropui takin an lo hmuak a, Brazilian group pakhat Astra Light pawhin zai leh lamin an lo lawm a ni.

